

續名醫類案

第三十五

S28

1819

1935

錢塘魏之琇編集

漢院呂大綱慎齋
海昌王士雄孟英 同校

膿疥

蘇頌曰、黔人治疥癬遍體諸藥不効者、生取白花蛇切斷、以

磚燒紅沃醋、令氣蒸、置蛇于上、以盆覆一夜、如此三次、去

骨取肉、以五味合爛、頓食之、眠睡一晝夜、乃醒、瘡死隨

皮便退、其疾便愈。本草綱目

張子和曰、貨生藥焦百善云、有莩夫來買苦參、欲治疥、不識

藥性緩急。但聞人言可治。濃煎一碗服之。須臾大吐痰涎
一盆。二三日疥作痂矣。

潘埏曰。予蔓孫患膿疥三年。身無完膚。下體尤甚。內治外治。
百無一效。乃治製一方。名和中固氣湯。以蒼朮一錢。燥濕。
白朮一錢。固脾。黃耆一錢。實腠理。升麻八分。柴胡一錢。引
清氣。元參八分。散上焦火。芩連各七分。清中焦火。黃柏七
分。伏下焦火。歸身一錢。養心血。甘草。陳皮。人參各五分。調
中氣。煎服存渣。加白蒺藜。金銀花煎洗。十數劑而全愈。

楮
記

室

姚應鳳診一人。遍體發小疥如粟。應鳳曰。是名淨海瘡。不治。

生治死。其人不信治之死。

錢塘縣志

元希聲侍郎治卒發疥秘驗方。石灰隨多少。和醋漿水調塗。隨手即滅。一法用石灰炒紅。出火氣。香油調傅。

薛立齊治瘡。勳李龍岡患疥。腿足爲甚。日晡益熾。口乾作渴。小便頻赤。此腎經虛熱。用補中益氣湯。五味丸而痊。

一儒者善噫。患疥以爲內有濕熱。腠理不密。外邪所搏也。與補中益氣湯。加白芷。川芎治之。不從。自服荆防敗毒散。痛處發腫。小便赤澀。此肺腎陰虛。用補中益氣湯。加五味。麥冬而愈。

一儒者患疥。誤用攻伐之劑。元氣虛而不能愈。用補中益氣

湯加茯苓。其瘡頓愈。又因調養失宜。日晡益甚。其腿日腫。夜消。以爲氣血虛而有熱。朝用補中益氣。夕用加味逍遙。而愈。

一男子時疫愈後。所患如前。用前藥補養而愈。有同患用砭法出血而死。此因陰虛血熱。色黑作癢也。何乃反傷陰血哉。

一婦人疥久不愈。食少體倦。此肝脾虧損而虛熱。先用補中益氣湯。加川芎炒梔。元氣漸復。更以逍遙散而愈。若復間譫語。此熱入血分。用小柴胡湯加生地治之。血虛者四物合小柴胡湯。熱退却用逍遙散以補胃生陰血。或有寒熱。

如瘧亦治以前藥。

一婦人患疥作癢膿水不止脈浮無力以消風散四劑少愈更以四生丸月餘而平。

一男子癢少痛多無膿水以芩連荆防山梔薄荷白芍歸梢治之而愈。

一男子患疥焮痛發熱脈浮數以人參敗毒散四劑少愈更以當歸飲子數劑而愈。

一男子患疥焮痛寒熱便秘脈數有力以防風通聖散二劑少愈更以荆防敗毒散加黃芩山梔四劑而愈。

一婦人患疥作癢午後尤甚以當歸飲子數劑少愈更以人

參荆芥數劑而安。

薛立齋治一男子患疥久不愈搔起白屑耳作蟬聲以四生

散白附子黃耆
獨活蒺藜數服癢止更以當歸飲子數劑而痊。

一男子患疥下體居多癩痛日晡尤甚腿腕筋紫而脹脈洪大此血熱而然也。就於紫處刺去瘀血以四物湯加芩連地骨皮柴胡四劑而安。患在上體若臂腕筋紫脹亦宜刺去其血。以前湯加柴胡黃芩即愈。

一男子搔癢成瘡日晡痛甚以四物加芩連荆防數劑而止。更以四物加蒺藜首烏黃耆二十劑而愈。

習化寺一僧病瘡疥自用雄黃艾葉等藥燃於被中熏之翌

日遍身焮腫皮破出水飲食不入投以解藥不應而死蓋藥熏入腹內而散真氣其禍如此。

丁丑子舉家生瘡家人亦用此方熏之瘡不愈未幾變兒出痘症極凶藥不能下咽而歿殆亦受其毒耳。

一男子患瘡疥搔破出膿水面赤作渴大便堅實脈洪數左關寸爲甚此木火相搏也先用瀉毒丸料煎服熱勢頓減又用梔子柴胡散加味逍遙散而瘡愈。

一儒者遍身生瘡癢膿水淋漓自知醫服八珍荆防之類益甚脈洪大按之無力謂此氣血虛熱也用八珍湯加丹皮治之而愈繼娶後兩足生瘡久不愈尺脈數而無力用

地黃丸八珍湯而痊。

一男子患疥乾癢作痛，以芩連荆防山梔薄荷白芍歸稍治之而愈。

蔣仲芳治一僧初患疥，自以水銀蘄艾熏之，遂喘息胸滿，遍身浮腫，或投五皮飲不效，投椒目大黃等喘腫愈甚，曰氣道皮膚肺氣熱也。復以火熏，火毒傷肺，遂失降下之令，氣道塞，水道閉，喘息溺澀浮腫之所由來也。今復推蕩陰血，又傷若非童真，難免于死矣。以麥冬黃芩山梔桑皮花粉滑石木通燈草與之，四劑而愈。

薛案有一僧亦用薰法致死

胡氏子年二十餘，生膿窠已一年，服藥無算，長臥床席二三

日間昏暈數次。入其室。穢氣盈溢。膿血痛苦。仰臥不能轉側。兩手背皆瘡。不能診候。問其飲食。惡心否。云。尚可飲食。曰。胃氣在。可生也。卽以黃耆。白朮。當歸。甘草。廣膠爲主。佐以銀花。浮萍。煎之以酒。六劑瘡愈大半。二十劑而全愈。

姚氏婦有子。而胸乳肥瘡。如桃背。及下半身俱滿。異痛異癢。膿血淋漓。已經三月。不時寒熱。漸作惡心。蔣曰。病急矣。但喜其日未久。因乳子而氣血驟虛。因多臥而飲食不運也。亦以前方加黃柏。連翹。陳皮。香附。外以大黃。樸。硝。松。香。東丹爲末。少加飛鹽。麻油調敷。亦不久而愈。此二人者。胡子清熱消運之品。俱爲日久虛弱者設也。若初起壯實者。粒

如小粟而多癢。曰疥瘡。風熱爲勝。理以苦參黃栢荆芥防
風爲君。膿泡如痘而多痛。曰膿窠。濕熱居多。理宜蒼朮秦
芫銀花連翹爲主。俱加天麥門冬酒炒黃芩。以清肺。蓋肺
主皮毛。肺熱則皮毛有是疾也。若日久則肺虛。又宜補肺。
而不宜清肺矣。此意先哲未及故附之。

癬

張子和治一女子年十五兩股間濕癬長三四寸下至膝發

癢時爬搔湯火俱不解癢定黃赤水出又痛不可耐灸炳
熏燥硫黃藺茹僵蠶羊蹄跟之藥皆不效其父母來求療

張曰能從予言則瘥。父母諾之。以排針磨尖快。當其癢處。于癬上各刺百餘針。其血出盡。煎鹽湯洗之。如此四次。大病方除。此方不盡。以告後人。恐爲癬藥所誤。涇涇于血。不可不砭者矣。

薛立齋治一人生風癩似癬。三年不愈。五心頻熱。脈洪。按之則澁。此血虛之症。當以生血爲主。風藥佐之。若專攻風毒。則血愈虛。而熱愈熾。血被煎熬。則發癩癧。或爲怯症。遂以逍遙散數劑。及人參荊芥散。二十餘劑而愈。

劉禹錫傳信方云。予少年曾患癬。初在頸項間。後延上左耳。遂成涇瘡。浸淫。用斑蝥狗膽桃根諸藥。徒令蜚蠊。其瘡轉

盛偶于是州賣藥人。教用蘆薈一兩研，甘草炙半兩，相和合勻。先以溫漿水洗癬，乃用舊乾帛子拭乾，便以二味合

和傅立乾，瘥神效。

草本

立齋治一男子，面青腿內，臙患癬，色赤作癢，或爲砭刺出血，發熱，焮痛，服消風散而益甚。服遇仙丹，愈加發熱，作渴，仍服之，膿水淋漓，其脈洪數。左關爲甚。此肝經血虛，火內動，復傷其血，而瘡甚。先用柴胡清肝散數劑，又用四物山梔治之，諸症漸退。用八珍湯、地黃丸，兩月餘而瘥。

張子和治一童子，病滿胸腹，溼癬，每爬搔，則黃水出，已年餘。先以未作丸上涌，次以舟車丸、瀉川散，下三五行，次服涼

膈加樸硝。並成時時啣之不數日而愈。

疔瘡

翟立之素善飲，遍身疔瘡，搔起白屑，上體爲甚，面目焮腫成瘡，結痂承漿，眼赤出淚，左關脉洪數有力，或作癘風治之。膿潰淋漓，此肝火溼毒，以四物湯加乾薑、連翹、山梔、柴胡。一劑諸症悉退，四劑全退，兩睛各顯青白翳一片，亦屬肝火再劑翳去，乃用六味丸而愈。

一儒者身發疔瘡，時起赤暈，憎寒發熱，服癘風之藥，眉落筋攣，後疔瘡漸潰，日晡熱甚，肝脈弦洪，餘脈數而無力，此肝

經血虛風熱也。先以小柴胡合四物湯。加丹皮酒炒黑梔。再與加味道遙散。加參朮鈎藤。服兩月瘡悉愈。而眉漸生。後因怒復作。用小柴胡湯。加芎歸鈎藤木賊而愈。後勞役發熱。誤用寒劑。不時身癢。日晡赤暈。早與補中益氣湯。加五味麥冬山藥。午後與加減八味丸。尋愈。後食炙燻等物。仍發疙瘡。小便白濁。關脈滑大有力。用補中益氣湯。加山梔。諸症悉退。

一男子秋間發疙瘡。兩月餘漸高。有赤暈。月餘出黑血。此風熱血虛所致。先用九味羌活湯。風熱將愈。再用補中益氣湯而愈。後不慎房慾。復作盜汗。晡熱口乾。唾痰體倦。嬾言。

用補中益氣湯加減八味丸頓愈。

一婦人遍身疙瘡搔癢敷追毒之藥成瘡出水寒熱脇痛小便不利月經不調服祛風之藥劑形體消瘦飲食少思此肝火血燥生風也前藥益傷肝血先用歸脾湯二十餘劑。又用加味道遙散二十餘劑諸症漸愈乃用六味地黃丸調理而瘥此等症候服風藥而死者多矣。

一男子不時患疙瘡搔癢成瘡膿水淋漓惡寒發熱先用蒼活當歸散而瘥止又用易老祛風丸而不發後飲燒酒起赤暈二便不通口舌生瘡熱渴不安用防風通聖散二便遍利但口乾體倦飲食不入用七味白朮散去木香四劑

而愈

一男子遍身患疔瘡作癢勞而益甚用參耆歸朮爲君佐以柴胡炒芩桔梗川芎炙草而痊。更用補中益氣湯之劑後不再發。

一男子患疔瘡癢發熱形氣虛弱口鼻氣熱且喜飲冷屬外邪也以消風散二劑外邪悉解但倦怠少食更以參耆陳皮炙草五味而健又以補中益氣湯去柴胡升麻加茯苓白芍乃痊。

一男子患疔瘡多在臀脚勞役則癢甚小便色黃服敗毒散芩連之劑思慮癢痛夜不能寐此脾氣下陷用補中益氣

湯加五味麥冬炒黑黃柏治之而痊凡病日間如故日晡
倦怠遇勞愈加晨起如故皆元氣虛也宜用前藥補而治
之。

一男子患疙瘩色黯作癢出黑血日晡至夜益甚其腿日腫
夜消以爲氣血虛而有熱朝用補中益氣湯夕用加味道
遙散而愈

一儒者應試後遍身搔癢後成疙瘩此勞傷元氣陰火內熾
秋寒收斂腠理鬱熱內作補中益氣湯加茯苓川芎白芷
而愈後復勞仍作惑于人言服祛風敗毒藥如大風之狀
又發熱作渴倦怠懶食用補中益氣湯倍參耆歸朮半夏

茯苓五味麥冬而愈。

一婦人遍身患疔瘡發熱作癢內服敗毒祛風外搽攻毒追蝕各潰成瘡膿水津淫形氣消瘦飲食日減惡寒發熱作渴飲冷脈浮數按之則澁此元氣復傷也先用七味白朮散數劑其渴漸止飲食稍加乃用八珍湯加柴胡丹皮膿水漸乾又用六君芎歸丹皮山梔瘡漸收斂仍用八珍山梔丹皮而愈。

一婦人因怒寒熱發赤暈服祛風之劑發疔瘡或砭出血患處焮腫發熱頭痛內服外敷俱係風藥膿水淋漓服花蛇酒之類前症益甚更加晡熱煩渴不寐脈洪大按之如無

此血脫煩燥。先用補血當歸湯稍緩用四君當歸數劑得
睡但倦怠頭暈少。食用補中益氣湯加蔓荊子稍可。又用
八珍湯加用芎芩倍用參朮。三十餘劑而能步履。又復月
餘而痊。

一婦人性急善怒。月經不調。內熱口苦。患疔瘡作癢。服敗毒
之藥。膿水淋漓。熱渴頭眩。日晡益甚。用加味逍遙散漸愈。
後因大怒。月經如涌。眼出淚。用四物湯加山梔柴胡連苓
數劑而愈。年餘左足臂腕起白點。漸大。搔起白屑。內熱盜
汗。月經兩月餘一至。每怒或惡寒頭痛。或不食作嘔。或胸
乳作脹。或腹內作痛。或小便見血。或小水不利。或白帶注

下。此皆肝木制伏脾土。元氣虛而變症也。用補中益氣湯。加炒黑山梔。及加味歸脾湯。服半年而愈。後每怒惱患赤暈。或以風疾治之。發疔瘡。又服遇仙丹。赤腫作癢。出膿水。外敷追蝕之藥。寒熱作渴。又服胡麻草烏之藥。遍身癢癢。眉毛脫落。膿水淋漓。咳嗽發熱。月經兩月一行。用四君當歸丹皮。月餘熱渴稍止。飲食少進。又服月餘。咳嗽少可。却用八珍湯加丹皮。二十餘劑。患處漸乾。經水如期。復因傷食作瀉不食。用六君子湯。飲食漸進。又因怒發熱作渴。患處作痛。經行不止。用加味逍遙散。漸可。仍用四君子湯而

全愈。

一女子二十歲。月經先期。或過期。或怒。則身發赤暈。或患疔瘡。六七日方退。服祛風藥。搔癢作渴。搔破成瘡。膿水浸淫。曰此肝火生風。再服是藥。必致筋攣不悟。後兩手拘攣。始信。先用地黃丸四物湯。月餘。熱渴頓減。乃佐以加味逍遙散。又月餘。患處膿少。又用四君子山梔丹皮二十餘劑。指能伸屈。因怒發熱。經水不止。睡中筋脈抽動不安。以加味逍遙散加鈎藤治之。而痊。仍用四物山梔鈎藤丹皮。而瘡結靨。乃去鈎藤。調理元氣。復而瘡靨乾。

一女子常患癰疹。作癢。因怒發熱。變爲疔瘡。腫甚。用梔子清肝散治之。而愈。後又怒。患痕起。赤暈。遊走不定。自砭出紫

血甚癢徹骨其熱如炙如大麻風欲用風藥治之不效。乃以當歸補血湯四劑其熱悉止。又用聖愈湯加味道遙散而痊。

一婦人身發疙瘡。或如丹毒。癢痛不常。搔碎成瘡。膿水淋漓。發熱渴煩。頭目眩。日晡益甚。此血虛內熱之症。以當歸飲加柴胡山梔治之而愈。

一婦人患前症。肢體疼痛。頭目不清。自汗盜汗。月水不調。肚腹作痛。食少倦怠。先用人參荊芥散。後用逍遙散。治之而痊。

一婦人因忿怒身發疙瘡。憎寒發熱。此肝火用小柴胡湯加

山梔黃連治之而愈後口苦脇痛小便淋漓復用前藥遂全愈。

一婦人患前症發熱夜間譫語此血分有熱以小柴胡湯加生地治之而安後用四物湯加柴胡山梔丹皮而熱退又用逍遙散全愈。

一女子常患疥瘡時或作癢服消風之類搔破成瘡其癢不止延及頭面先用羌活當歸散其癢頓止用加味逍遙散其熱頓痊又用當歸飲而瘡亦愈用八珍柴胡山梔而不
再作

血風癩疹

薛立齋治一男子面赤作渴面常患小瘡作癢服祛風藥遍身發赤癩服白花蛇酒更發赤暈遍行砭刺又服消風散發熱口渴飲水不止謂肝經血虛而風熱也用梔子清肝散及地黃丸料煎服熱渴漸止瘡漸結靨用八珍湯地黃丸瘡靨漸脫又復月餘瘡漸愈。

一男子面生粉刺或生小癩服消風散瘡益甚服遇仙丹加遍身赤癢仍服前藥發熱焮腫又服旬餘潰而出水形體骨立先用四君子當歸桔根四劑飲食稍進又用八珍湯

數劑而痊。

一男子嗜膏粱炙煇醇酒辛辣之物。遍身生痞癩甚。癢服消風散之類。更起赤暈。又砭出血。其癢益甚。敷敗毒之劑。遂各成瘡。膿水津淫。眉毛漸脫。赤癢益甚。此脾經積熱傷血所致。先用犀角地黃湯。加黃連治之。膿水漸止。乃以八珍湯加山梔丹皮。眉毛漸生。因飲食失宜。胸腹作脹。飲食少思。或大便下血。用五味異功散加升麻。飲食漸進。又用補中益氣湯而血止。仍用異功散加當歸丹皮而痊。

一女子性急多怒。月經先期。患痞癩色赤。作癢搔破。膿水不止。服祛風藥。其瘡益甚。服花蛇酒。四肢癱瘓。眉毛脫落。先

用柴胡清肝散加鈎藤數劑。又用加味道遙散加鈎藤。諸症漸愈。又用易老祛風丸而安。

一女子年十四。腕軟處生物如黃豆大半在肉中紅紫色痛甚。諸藥不效。一方士以水銀四兩白紙一張。揉熟蘸水銀擦之。三日自落而愈。李樓怪症

朱丹溪治朱院君三十餘。久患癰疹身痺而紫色。與防風通聖散。加牛蒡為極細末。每一錢水盞半入薑汁合辣煎食。熱飲之。

汪石山治一人年逾六十。形瘦蒼紫。夜常身癢搔之熱。蒸皮肉磊如豆粒。癢止熱散。肉磊亦消。醫用烏藥順氣升麻和

氣等不效。診之脈皆細濡。近駛曰：此血虛血熱也。而爲順氣和血。所謂誅罰無辜。治非所宜。遂以生地、元參、白茯苓、歸芍、蒼朮、黃芩、甘草、陳皮煎服。月餘而愈。

一老人患疹。色微赤。作癢發熱。以人參敗毒散。二劑少愈。以補中益氣湯。加黃芩、山梔而愈。

一婦人遍身搔癢。秋冬則劇。脈浮數。此風邪客於皮膚而然也。名曰血風。飲以消風散。及搽蛇床子散。少可。更以四物湯。加荆防。數劑而愈。一婦患此。夏月尤甚。脈洪大。以何首烏散。一婦患赤斑瘙癢。搔破成瘡。出水久而不愈。內服當歸飲。外搽蛇床子散。並愈。又一婦患此。諸藥不應。以四生

散數服而愈。大抵婦人體虛。風邪客於皮膚。則成白癩。寒溼客於肌肉。鬱熱而爲赤癩。色雖有異。治法頗同。凡人汗出。不可露臥及浴。經云。汗出見溼。乃生瘡。痲雷公云。遍身風癩。酒調生側柏用之。屢驗。

瘙癢

薛立齋治一男子。遍身瘙癢。後成瘡。出水。洒淅惡寒。皮膚皴起。眉毛漸落。大便秘結。小便赤少。此屬肺火爲患。用補氣瀉榮湯四劑。諸症漸退。但倦怠惡寒。小便清少。此邪氣去而真氣虛也。用補中益氣湯。兼換肌散。半載元氣復而諸

症退。時中秋忽大便不實。小便頻數。體倦食少。洒淅體重。此溼邪乘虛而作。用東垣益胃湯二劑頓安。仍用前藥調理三月餘全愈。

一男子兩目俱赤。遍身癢痛。搔起白皮。此肝肺陰虛。誤服驅風燥劑。鼻赤面紫。身發疙瘩。搔出血水。用升麻湯下瀉青丸數服。又用加味逍遙散數劑。身鼻漸白。疙瘩漸消。又用四物湯加參耆柴胡山梔并換肌散各百餘服。喜其年少。謹疾全愈。

一婦人日晡身癢。外內用追毒祛風之劑。膿水淋漓。午前畏寒。午後發熱。殊類癘風。用補中益氣湯加山梔鈎藤。又以

加味道遙散加川芎而愈

一婦人手心赤搔癢發熱頭暈作渴晡甚服祛風清熱之藥
膚見赤痕月經過期用加味道遙散倍熟地熱止癢退更
以四物湯加柴胡參耆炙草茯苓頭清渴止再用四物湯
加參朮茯苓山梔赤暈亦消

一男子患瘙癢破而成瘡如大麻風服遇仙丹發熱作渴大
便秘結脈沈實右關爲甚此熱畜於內也先用黃連內疎
湯而大便通利又用防風通聖散去硝黃而熱渴止却用
八珍湯而瘡愈

一男子脾腎氣虛血熱遍身搔癢時喜熱水浴之後患瘡癩

破而用水用風藥益甚或赤或白眼作花癢先用胡麻散
六味丸而痊次年兩股小腹頸項復作癢用四生散六味
丸而愈。

一婦人經水先期勞役或氣惱則寒熱瘙癢服祛風降火等
藥不勞怒而自發熱更加痰喘氣促服化痰清氣之藥
形氣倦怠食少胸痞身發瘡疹服消毒之類膿水淋漓服
大麻風藥口乾作渴欲水而不敢飲經水又過期眉間若
動又復月餘眉毛脫落經水淋漓此心肝二經風熱相搏
制金不能平木木尅脾土而不能統血肝火旺而不能藏
血也經云水生木遂朝用地黃丸以滋腎水生肝血夕用

加味逍遙散。以清肝火。生肝血。月餘諸症漸愈。又佐以四
君芎歸丹皮。月餘而經水旬日而止。又兩月餘經水五十
餘日而至。乃夕用五味異功散加當歸。服兩月經水四十
餘日而至。因怒寒熱。經水如崩。眉稜角動。脈洪數弦。肝脾
二脈爲甚。用柴胡梔子散二劑。以平肝火。用五味異功散
二劑。以補脾氣。發熱頓退。經水頓止。更以八珍湯倍加參
朮及地黃丸。兩月餘經水如期。眉毛漸生。因食停滯。腹脹
作痛。另服祛逐劑。泄瀉不止。小腹重墜。飲食甚少。先用六
君子湯送四神丸數劑。瀉漸止。飲食少進。又用補中益氣
湯。倍用升麻。數劑重墜漸愈。後因勞心發熱。飲食難化。嘔

曆因怒寒熱腹脹飲食少思患處復甚。用六君子湯加山
梔柴胡。乃用四君子湯爲主。而瘡漸愈。又因怒月經甚多。
發熱作渴。瘡痛出血。用柴胡清肝散。熱退止痛。仍用四君
子湯而結曆。又用八珍湯。山梔丹皮而愈。

一婦人遍身瘙癢。膿水淋漓。發熱身如蟲行。月經不調。先用
升麻湯送瀉。一丸熱癢頓退。又用加味道遙散。經行如期。
用換肌丸而瘡愈。後因怒經行不止。筋骨作痛。用秦芫地
黃湯。易老祛風丸而愈。

一婦人性沈靜。懷抱不樂。月經過期。遍身作癢。服祛風清火
之劑。搔破成瘡。出水不止。其癢益甚。或用消風散之類。眉

稜跳動，眉毛折落，又服遇仙散，患處俱潰，咳嗽發熱，飲食日少，月經先期，作肝脾鬱怒，而血燥，前藥復傷，而益甚。先用四君子、芎歸、山梔、丹皮。飲食漸進，服月餘而嗽止。又以加味道遙散，加鈎藤二十餘劑，而眉不動。乃去鈎藤，倍加參朮、當歸、月餘，瘡結靨。又以八珍湯加山梔、丹皮而痊。一婦人患前症，膿水淋漓，發熱作渴，體倦惡寒，經水不利，久而不愈。此肝脾虧損而虛熱也。先用補中益氣湯加山梔、川芎，而元氣漸復。又用道遙散，而瘡漸愈。又虛後患疥，遍身作癢，搔起疙瘩，破而出膿，或出血水。誤服醉仙散，殊類風症。用八珍湯數劑而安。又用十全大補湯，患處漸乾矣。

一婦人日晡身癢素清苦因肝鬱怒遍身晡熱內熱自汗盜汗月經不行口乾咽燥用歸脾湯數劑諸症稍退後兼加味道遙五十餘劑而痊。

一婦人癢發熱日晡益甚皮膚赤暈月經過期此血虛而有熱也以逍遙散倍加熟地熱止癢退更以四物加柴胡參耆灸草茯苓調理而愈。

一婦人懷抱久鬱患前症膿水淋漓服連翹消毒散食少胸痞服清氣化痰丸作嘔吐痰服清熱化痰丸煩熱畏寒四肢焮熱面目赤色脈大而無力此脾胃虧損而虛寒隔陽氣于外遂用六君子湯加炮薑治之諸症少愈飲食頓進

又佐以四物湯。諸症漸愈。又以四君子。每味各一錢。四物湯。每味各五分。諸症全愈。

一婦人每秋間。兩手心作癢。搔起白屑。因勞役惱怒。則發寒熱。遍身作癢。起疙瘡。或以爲風症。內服花蛇等藥。外敷硫黃之類。又服遇仙丹。諸熱渴益甚。月水不通。謂脾肝二經血燥生風。先用加味道遙散。熱渴漸減。又用八珍柴胡山梔。患處少可。後因怒氣發熱。脇痛。患處焮腫。用加味道遙散。四劑而安。又用四君芎歸山梔丹皮。至半載而痊。

一男子遍身瘙癢。諸藥不效。脈浮。按之而澁。以生血藥爲主。間以益氣百貼而愈。

宋生遍身作癢搔破成瘡出水脈浮數此手足陽明經風熱所致以人參敗毒散對四物湯加芩連服之外以松香一兩枯礬五錢輕粉三錢爲末麻油調敷月餘而愈又一人患此但脈沈以前藥加大黃治之漸愈再服人參敗毒散而平。

黃錦芳治一僧身癢異常服驅風敗毒藥不愈診其脈左手俱平靜惟脾脈湧突異常詢得飲食無味飽脹時噉此內氣不清而濁邪外溢於經絡也用茯苓三錢半夏二錢木香八分廣皮五分川厚朴一錢日服二劑遂愈。

瘡癩

陸肖愚治徐邑宰秋去冬初遍身生癩大小不一紅痛炊癢黃水淋漓或謂風熱用防風通聖數劑不減或謂諸痛瘡瘍皆屬心火用芩連山梔生地等十劑益甚且飲食漸減脉之浮按微數沈按中按皆緩而弱曰凡風熱大都爲癩疹未必爲瘡癩至瘡瘍之爲心火經固言之第脉微弱爲多此元氣不足也緩者濕也數雖爲熱而微數不可純責之火據今日之症火爲標溼爲本原得病之由又溼爲標元氣不足爲本此必乘虛汗出澡浴溼漬肉腠久而熱蝕

爲膿水發爲痛癢也。用蒼朮、薏仁、茯苓、燥淫爲君，人參、白朮、黃芪、甘草、補氣爲臣，連翹、蟬退、清熱爲佐，葛根、白芷入陽明肌肉爲使。二劑痛癢頓減，胃少開。十劑全愈。

張子和治穎臯韓吉卿自髀至足生溼，腫大者如錢，小者如豆。癢則搔破，水到則浸淫，類虫行袴襪，愈而復生，癩痕成四十餘年。不瘥，張晒之曰：此溼，蠶瘡也。由水溼而得，故多在足下。以舟車、濟川大下十餘行，一去如掃。

一省掾背項常有瘞癩，愈而復生。張曰：太陽血有餘也。先令涌泄之。次于委中，銜鍼出紫血，病更不復作也。張君衮常喜熱火，烘灼其背及兩足，又食自死肉，久而兩足常生癩。

毒愈而復生半月餘以清涼飲子下之得紫黑血積于便
中去者月餘其積毒頓除是知積熱毒致癰腫者如此。

薛立齋治春元沈寬川之內暑月面生瘰癧乘涼入風面目
浮腫越二日左臂腫痛癢疹如丹背脇髀股等處發腫塊
三四肉色不紅痛甚晝夜號呼寒熱往來飲食不思服活
命飲及行氣敗毒之劑其熱愈熾肝脈浮瀦脾脈弦弱此
屬二經榮氣不從風邪乘虛流注經絡爲患先以八珍加
黃芪柴胡青皮數處漸漸紅焮又以十全大補加銀花白
芷龍膽草貝母十餘劑脇腿二處潰膿碗許餘塊漸平仍
服十全大補湯調理月餘而安向使專于祛風攻毒鮮不

敗事矣

張仲安治凍瘡用黃柏燒存性。研細以雞子清調敷破者。乾
糝上袖妙。

治暑月肌膚瘡爛。或因搔成瘡。多是大暑汗出。坐卧溼地。致
肌膚多瘡。爛汁出。有一乳母曰。此易瘡也。取乾壁細土末
敷之。隨手卽瘥。

治一切惡瘡。通用藥不效者。陳米飯緊作團。火煨存性。麻油
膩粉調敷。蘇沿光丁亥年。耳上病碎瘡。或痛或癢。兩月餘。
百藥不效。季倅子長傳此方。初不之信。試用之。果日卽愈。
辛丑年再作。呂仲發顯謨云。此症夏以痰飲法治之。故只

用肥皂燒存性。生油膩粉調敷尤佳。

薛立齋治一男子年四十三歲。自四十已來。每至夏發熱而倦。日午益甚。晚涼少可。面生瘡癩。耳下筋微腫。更結小核三四枚。附筋上。曰此火令不慎房勞。虧損腎水。不能制火然也。名曰注夏。彼不信。服降火敗毒藥。加口乾倦怠。夜間熱甚。午後腿軟。足心熱。筋牽痛。復來問治。曰口乾倦怠。此中氣陷下也。夜間發熱。陽氣陷于陰分也。午後腿瘦足熱。陰虛火甚也。耳下筋牽痛。血虛不能潤筋也。先以補中益氣湯。少用柴胡升麻。加五味麥冬。熟地治之。諸症頓退。更服滋腎丸而痊。若以每至火令而然。用敗毒涼藥。鮮不危。

矣。凡春末夏初患頭痛脚軟食少體熱。此仲景云春夏劇
秋冬瘥。而脉弦大者。正世俗所謂注夏病也。

趙州守北方人年踰四十頭面生瘡瘍數枚。焮痛飲冷積日
不潰。服清熱消毒藥不應。診其脉數。按之則實。以防風通
聖散。二劑頓退。又以荆防敗毒散而愈。又一男子患在四
肢。審其脉症亦屬有餘。以黃連解毒湯治之亦愈。

繆仲淳治一婦人。生癩臂上用連翹白芷白芨花粉各二錢。
甘菊一兩。紫花地丁金銀花各五錢。甘草生地茜草各三
錢。地榆四錢。角刺牛蒡各一錢。服之半日。立出膿血而愈。
又治一男子生癩膝下。加牛膝三錢。立破出鮮血愈。

廣筆記

丁右武親驗坐板瘡方。松香五錢。雄黃一錢。均研細。如濕瘡。加蒼朮三錢。各末和勻。以緜紙包裹。擦成紙。燃二條。臘月猪油浸透。點火燒著。取滴下油。搽上立效。上全

立齋治一男子。年逾四十。胃氣素弱。面常生瘡。盜汗發熱。用黃芪建中湯少愈。更以補中益氣湯而平。東垣云。氣虛則腠理不密。邪氣從之。逆于肉裏。故多生瘡。若以甘溫之劑。寔其根本。則腠理自固。卽無他疾。

張生患漆瘡作嘔。由中氣弱。漆毒侵之。以六君子湯加砂仁。藿香酒芍治之。彼不信。另服連翹消毒散。嘔果盛。復求治。仍以前藥。外以麻油調鍊鏽末塗之而愈。

趙千兵患兩腿生瘡。每服敗毒藥。則飲食無味。反增腫脹。此脾虛濕熱下注也。以六君子湯加蒼朮升麻酒芍服之。以黃蠟麻油各一兩。輕粉三錢。爲膏貼之而愈。大凡下部生瘡。雖屬溼熱。未有不因脾腎虛而得者。

一男子溼熱下注。兩腿生瘡。以人參敗毒散加蒼朮黃柏服之。以金黃散敷貼。又一人患此久而不愈。以船板灰存性一兩。輕粉三錢。爲散。麻油調敷。更以黃柏知母防己龍膽草茯苓當歸川芎黃芪白朮服之。亦愈。若人兩腿作痛。或遍身作痛。以當歸拈痛湯治之。

一婦人兩腿腕紫黯寸許。搔破出水。或用祛風破血之劑。年

餘漸平如掌，乃服草烏等劑，遍身瘙痒，有時出血水，內熱體倦，飲食無味，月經三月一至，脈洪而數，按之則澁。此燥劑愈傷脾血也。先以補中益氣湯，加白芍、川芎、五味，十餘劑，乃與加味道遙散，加熟地、鈎藤，二十餘劑，再用歸脾湯，加川芎、熟地，治之而不發。

一婦人素清苦，四肢似癬疥，作痒出水，怒則起赤暈，服祛風敗毒等劑，赤暈成瘡，膿水淋漓，晡熱內熱，自汗盜汗，月經不行，口乾咽喉腫痛，此鬱傷脾血也。用歸脾湯，道遙散，兩月而痊。

一儒者素食膏粱，發熱作渴，飲冷患瘡，如大麻風，大便出黑

血服清熱祛風等寒藥益甚。謂血分有熱火也。故寒之不寒。用四物二連湯。以清熱涼血。用六味丸以補腎生水而熱退。又用柴胡梔子散調理而痊。

一婦人性急善怒。月經不調。內熱口苦。患時瘡。服敗毒藥。膿水淋漓。熱渴頭痛。日晡益甚。用加味逍遙散服之。漸愈。因大怒。月經如湧。眼赤出淚。用四物湯加山梔柴胡芩連數劑而愈。年餘手足臂腕起白點。漸大。搔起白屑。內熱盜汗。月經兩月餘一至。忽怒或惡寒頭痛。或胸乳作脹。或腹內作痛。或小便見血。或小便不利。或白帶下注。此皆肝木制伏脾土。元氣虛而變症也。用補中益氣湯加黑山梔。及加

味歸脾湯間服半年而愈

一婦人久鬱患在四肢，腮腕尤甚，誤用敗毒寒涼之劑，脯熱內熱，自汗盜汗，月經不行，口乾咽燥，此鬱火傷脾也。用歸脾湯數劑，後兼服逍遙散五十餘劑而痊。

劉松篁經驗方云：會水灣陳玉田妻患天蛇毒瘡，一老翁用水蛇一條，去頭尾，取中截如手足指長，刮去骨肉，勿令病者見。以蛇皮包手指，自然束緊，以紙外裹之，頓覺遍身皆涼，其病即愈。數日後解視，手指有一溝如小蠅蛇皮內宛然，有一小蛇頭目俱全也。本草綱目

孫思邈以貞觀五年七月十五日夜，以左手手中指觸著庭木

至曉遂患痛不可忍。經十日痛日深。瘡日高大。色如熟小豆色。嘗聞長者論有此方。遂用治之。手下即愈。痛亦除。瘡亦即瘥。未十日而復如故。方用蒲公英搗爛取汁塗之愈。

全上

張子和曰。麻先生妻病足指痛不可忍。酒調通經散一錢半。夜先吐。吐畢而痛減。余因歎曰。向見陳五曾病此。醫以爲小蟲傷。或以草上有毒物觸之。遷延數月。膿盡方已。今日觀方。可發大笑。

王思中治一人患瘡疹陰囊腫脹如斗升不能跬步。王曰。此瘡蠱也。就外科劑中加麥稈四十九莖。遂消。

吳江縣志

戊申之水乃二百餘年創見之變人足浸水中數日卽皮破
生瘡痛不可忍一法取水荆條煎水浴之立愈續金陵瑣事

梁谿一男子生癩膝下楚甚仲淳適至卽于席間作劑服之
飲酒數杯癩立破出鮮血愈連翹二錢白芷二錢粉甘草
水炙三錢金銀花五錢牛膝三錢生地三錢地榆四錢皂
刺一錢鼠粘子酒炒研一錢

癩症

魏玉橫治吳性全忽患症如癩風眉毛脫落面額褪皮皮去
肉色又如白癩風耳前後目上下多生小癩乳旁及腿上

亦有頗多膿血。往時久病喘。予以養肝之劑。愈之。自是足趾縫及兩旁常作痒。出稠水。及面瘍既發。足疾頓愈。有指爲風者。有指爲溼者。指爲牛皮癬。大麻風者。幸渠素不輕藥。守至數月不愈。乃就診。余曰。前所指皆非也。此卽往時喘之變症耳。良由肝火熾甚。火極似風。上淫于肺。蓋火就燥也。前在經絡則爲喘。今在皮毛則爲瘍。薛立齋謂之癩瘍。瘍類症。治之必五十劑。乃瘳。與生地。杞子。萸仁。赤芍。甘草。麥冬。淨銀花。首烏之屬。出入加減。果五十劑而愈。夫肝木爲龍。龍之變化莫測。其于病也亦然。明者遇內傷症。但求得其本。則其標可按藉而稽矣。此天地古今未洩之秘。

內經微露一言曰肝爲萬病之賊六字而止似聖人亦不欲竟其端矣殆以生殺之柄不可操之人耳余臨症數十年乃始獲之實于慮之一得也世之君子其毋忽諸雄按此五

橫案余謂外感由肺而入內傷從肝而起魏氏長于內傷此言先得我心惟各門附案悉用此法豈生平得意在此而欲獨豎

一幟耶

瘍症便秘

薛立齋治一男子患癰未作膿歛痛煩躁便閉脈實用內疎

黃連湯二劑諸症悉退以四物湯加芩連四劑而消

一男子瘍症潰後便瀉脈浮按之則瀉以八珍湯加紅花桃

仁陳皮杏仁治之而愈。

一弱人患瘍潰後便秘而脈濇以四物湯加紅花桃仁黃芪治之而愈。

薛立齋治一男子患瘍潰後便秘而脈浮以四君子湯加陳

皮杏仁當歸治之而愈。雄按此症宜養血

一老人患瘍潰後大便秘小便赤澀診之脈浮數而澀以八

珍湯加知柏治之而愈後小便復數而赤大便秘口乾目

花以加減八味丸滋腎丸治之而愈此症乃陰血虛陽火

盛故用前藥有效若投苦寒之劑必致有誤矣

一男子患瘍潰後便濇肌膚作痒謂氣血虛不能營于腠理

用補劑治之不信。乃服風藥致不救。大抵瘡瘍始作便秘脈數而瀉者宜降火涼血爲主。潰後便秘脈瀉者宜補血氣爲主。若投風藥禍在反掌。

鄺進士患癰將痊大便秘結服大黃等藥反廢飲食乃用補氣血之劑加桃仁麻仁未效更以豬膽汁深納穀道續以養氣血而愈原病式云諸澀枯涸皆屬干燥燥者火之病氣病後血衰故大便秘澀宜以辛甘潤之如用苦寒則胃氣乏矣凡老弱產後便難者皆氣血虛也膽汁最效。

腎臟風

薛立齋治一男子患腎臟風飲燒酒發青暈。衄出血敷追毒之藥成瘡出水日晡益甚類大麻風服遇仙丹眉毛折落大便下血虛羸內熱飲食甚少勢誠可畏先用聖濟犀角地黃湯其血漸止又用五味異功散加當歸升麻飲食漸進用四物加參朮丹皮內熱漸減用易老祛風丸膿水漸少又以八珍丹皮之類漸結鑿因思慮發熱盜汗作痒赤暈用加味歸脾湯數劑熱漸止用加味逍遙散六味丸而痊

一男子遍身生瘡膿水淋漓晡熱口乾兩足發熱形體消瘦襍服風藥六年未愈尺脉洪數而腎經瘡也如小兒腎疳

之疹用加減八味丸不半載而痊

一男子遍身生瘡似疥非疥濃水淋漓兩腿尤甚作痒煩熱肢體倦怠年餘不愈以爲腎經虛火用加減八味丸而卽痊

一男子素膏梁醇酒患腎臟風延及遍身服癘藥益甚又用擦藥於被中薰之嘔吐腹脹遍身浮腫潰爛膿水淋漓如無皮而死

一男子患足三陰虛患血風瘡症誤服祛風敗毒之藥外敷班猫巴豆等藥肌肉潰爛嘔吐腹膨或泄瀉虛冷或煩熱作渴此症係脾胃虛敗也辭不治不越月歿

一男子患遍身小瘡，或時作痒，口乾作渴，服消風散，起赤痒益甚，服遇仙丹，膿水淋漓，飲食無度，肌肉消瘦，尺脈洪數，左尺尤甚，謂腎水不足，虛火上炎爲患，先用加減八味丸，其渴漸止，用補中益氣湯，加五味，肌肉漸生，佐以八珍湯，加丹皮、麥冬，百餘貼而痊，二年後不節房勞，其瘡復作，惑於人言，又服消風散之類，其瘡復患，仍用前藥，不一月而痊。

一男子內臟作痒，色黯搔起白皮，各砭刺出血，其痒益甚，更起赤暈，延及外臟，津淫不已，服怯風之藥，肢體亦然作渴引飲，左尺脈洪大而數無力，謂此腎經虛火，復傷其血，火

益甚而患耳先以八珍湯加五味子丹皮三十餘劑諸症漸退乃佐以加減八味丸料又百餘劑而痊

劉鴻臚生濕瘡數年不愈尺脈輕診似大重按無力此腎氣虛風邪襲之而然名曰腎臟風瘡以四生湯治之不信白服芩連等藥遂致氣血日弱膿水愈多形症愈憊迨二年復求治仍以前藥治之而愈夫肢體有上下臟腑有虛實世之患者但知苦寒之藥能消瘡毒殊不知腎臟風因腎氣不足所致當以蒺藜爲君黃芪爲臣白附子獨活爲佐使若再服敗毒等藥則愈耗元氣速其死矣

癘風

竇材治一人病癘症鬚眉盡落面目赤腫手足悉成瘡痍令
灸肺俞心俞二穴各十壯服換骨散二料二月全愈鬚眉
更生

雄按竇氏治中風用換骨丹治癘風用換骨散此與第
三條所用皆是換骨散

一人遍身赤腫如錐刺竇曰汝病易治命灸心俞肺俞二穴
各一百壯服胡麻散二服而愈手足微不隨復灸前穴五

十壯又服胡麻散二料全愈

雄按胡麻散用黑脂麻紫浮萍薄荷牛旁子甘草竇氏方

此最
平穩

一人面上黑腫左耳下起雲紫如盤蛇肌肉中如刀刺手足
不知痛詢其所以因同僚邀遊醉卧三日覺左臂黑腫如
蛇形服風藥漸減今又發竇曰非風也乃溼氣客五臟之
俞穴前服風藥乃風勝濕故當暫好然毒根未去今灸腎
俞二穴各百壯服換骨丹一料全愈面色光潤如故

張子和治桑惠民病面風黑色畏風不敢出爬搔不已眉毛
脫落作癩治三年張曰非癩也乃出素問風論曰腎風之
狀多汗惡風脊痛不能正立其色焇面龐浮腫今公之病
腎風也宜先刺其面大出血其血當如墨色三刺血變色

矣。于是下針自額上下，銑針直至頭頂，皆出血，果如墨色。徧腫處皆針之，惟不針目銳眦外兩旁，蓋少陽經。此少血多氣也。隔日又針之，血色乃紫。二日外又刺，其血色變赤。初針時痒，再刺則額覺痛，三刺其痛不可任。蓋邪退而然也。待二十餘日，又輕刺一遍，方已。每刺必以水洗其面十日，黑色退。一月面稍赤，三月乃紅白，但不服除根下熱之藥，病再作。張在東方無能治者。

雄按今更無能治之人矣，然不可不知有此證。

吳恕字如心，錢塘人，博極羣書，少貧，貨烏蛇丸治瘋疾，時乘

采風使適，有患此疾者，召恕與談，驚服其議論，遂委托治

之疾，果愈。

杭州府志

秘韞治大風用大烏蛇一條打死盛之待爛以水二碗浸七

日去皮骨入糙米一升浸一日晒乾用白雞一只餓一日

以米飼之待毛羽脫去殺雞煮熟食以酒映盡以熱湯一

盆洗大半日其瘋自愈

本草綱目

王海藏云王氏患大瘋病眉髮墮落掌内生瘡服紫苑丸半

月瀉出癩蟲二升如馬尾長寸許紫苑丸吳茱萸菖蒲柴

胡厚朴各一兩桔梗茯苓皂莢桂枝乾薑黃連蜀椒巴豆

去皮膜人參各五錢川烏三錢加羌活獨活防風各一錢

肉油炒蜜丸桐子大每服三丸漸加至五丸七丸生薑湯送下食

後臨卧服孕婦忌服之此方治病甚多不能悉錄

周子固治王君海子病癘眾醫莫能療周授已七藥漱之牙齦出穢血數升既而形盡瘦骨立後第以美味補之數月

瘡九靈山
房集

薛立齋治一男子冬間口苦耳鳴陰囊濕痒來春面發紫塊微腫麻木至冬遍身色紫不知痛痒至春紫處俱大至夏漸潰又至春眉落指潰此患在肝胆二經令刺手指縫并臂腿腕出黑血先與再造散二服下毒穢更以小柴胡合四物湯加白芷防風天麻角刺漸愈又與換肌散但遍體微赤此血虛有火因家貧未得調理秋間發熱至春面仍發塊用前散并養血藥喜年少謹疾得愈

一膏梁之人鼻壞眉落指脫體潰熱渴晡甚四物湯加炒黑
知柏五味麥冬白芷天麻角刺三十餘劑熱渴少止時仲
夏精神倦怠氣喘身熱小便黃澀大便稀溏此元氣虛而
時熱勝也用補中益氣湯頓安乃與換肌散及益氣湯兼
服兩月更以生肌散代茶飲瘡少退至仲秋眩暈少食自
汗體重大便溏稀此亦時溼之症用清燥湯調理而愈又
用補中益氣湯少加酒炒黑知柏角刺天麻兩月餘而痊
又因勞傷倦聾瞶熱渴誤服祛風藥病氣益劇身發赤疹
與益氣聰明湯月許而愈

大麻風症先麻木不仁次發紅
斑久則破爛浮腫無膿蓋皮死

麻木不仁肉死刀割不痛血死破爛流水筋死指節脫落
骨死鼻梁崩塌也又癩風症初起水泡作癢成瘡破流脂

水養至徹骨久則成片傳及遍身好浴熱湯徐靈胎曰大
麻風症總屬不治遷延歲月則有之然患此者絕少若稍
似風症並非真風醫者竟以治風之惡藥治之反傷敗氣
血變成風症此等最多不可不知又曰癩風之症有似大
麻風而毒氣不深全在肌肉故尙可治喻嘉言曰治癩風
以清榮衛爲主汗宜頻發血宜頻刺皆清榮衛之捷法也
生虫由於肺熱宜兼清肺然清肺亦必先清榮衛蓋榮衛
之氣腐而不清傳入於肺先害其清肅之令故也治宜生
血清熱爲主驅風殺虫爲輔易老祛風丸東坡四神丹最
爲平善可以久服取效奉以爲法焉祛風丸黃芪枳壳防
風枸杞子白芍甘草地骨皮生地熟地等分蜜丸
四神丹羌活元參當歸生地等分或煎或丸服

一男子赤痛熱渴膿水淋漓心煩掌熱目昧語澀怔忡不寢

此心經受症也。用安神丸兼八珍湯少加木通炒黑黃連

遠志。元氣漸復。卻行砭刺。外邪漸退。但便燥作渴。用柴胡

飲并八珍湯而愈。再用換肌散劑而瘥。

一男子壯見赤筋、面起紫泡、發熱作渴、寅卯時甚、脈弦數、腿轉筋、小便濇。此肝經火症。先用柴胡飲。熱退便利。卻用小柴胡合四物湯加龍膽草炒山梔三十餘劑。及八珍湯加柴胡山梔。調其血氣。乃用換肌散。去其內毒而安。年餘因勞役飲食失宜。寒熱頭痛遍身赤疹。自用醉仙散而歿。

一男子面發紫疔瘡、膿水淋漓、睡中搐搦、遍身麻木、漸發赤塊。勞則麻、怒則癢、肝脈洪大、砭刺臂腿腕各出血、用清胃湯加大黃角刺四劑。煎下瀉青丸。肝脈少退。以升麻湯數劑下前丸。諸症少愈。卻用寶鑑換骨散斤許。又用小柴胡合四物湯。加倉朮天麻角刺。百餘劑。及六味地黃丸半載。

而愈。後因勞遍身麻痒。脉微而遲。此氣血俱虛。不能榮於
腠理。用十全大補湯。加五味麥冬。調理年餘而安。

一男子面赤發紫泡。下體痒痛。午後發熱。大便燥黑。此火盛
而血虛也。用再造散及四物湯。加防已。膽草及刺腿指縫
出毒血而便利。仍以前藥加白朮。白芷。茯苓。獨活而便
黃。仍以四物去膽草。防已。少用獨活。加元參。葶藶。五十餘
劑而瘡退。却用補中益氣湯。加天麻。麥冬。而氣血漸充。時
仲秋霖雨。遍身痠痛。用清燥湯而安。隨用換肌散。胡麻散。
八珍湯兼服而愈。

一上舍面發腫。肌如癬。後變疙瘡。色紫。搔之出水。此脾肺之

症也。先用清胃湯。以清胃熱而解表毒。又用四物湯。加山
梔黃芩柴胡角刺甘草節。以養陰血祛風熱。又砭臂腿腕
手足指縫。并患處。以出毒血。疎通隧道。乃與八珍湯。加白
芷角刺五加皮全蝎。及二聖散。兼服月餘。以養陰血。治瘡
毒。又與補氣瀉榮湯。少愈。再與換肌散。而全愈。後因勞倦
遂發赤暈。日晡尤甚。以四物湯。加丹皮柴胡山梔。并用補
中益氣湯。年餘。雖勞而不發。

一男子遍身如癩。搔癢成瘡。色紫麻木。搯之則痛。小便數而
少。此脾胃受症。邪多在表。用清胃散。更砭刺患處。并臂腿
腕出黑血。神思漸爽。但惡寒體倦口乾。此邪氣去而真氣

虛也。以大劑參芪芩歸。藜藜桔梗。數劑元氣頓復。卻用八珍湯。加黃芪白芷。蒺藜天麻。軟柴胡。及二聖散治之。其瘡漸愈。後用換肌散。八珍湯等藥。調理半載而痊。後症仍發。誤用剋伐攻毒。患兩感傷寒而死。

一男子遍身疔瘡。搔則痒。掐則痛。便閉作渴。此邪在內也。治以再造散二服。微下三次。用桃仁承氣湯。加當歸四劑。及砭出黑血。漸加痛痒。但形體倦怠。用培養之劑。復其元氣。又用二聖散。其瘡頓愈。更用大補年餘而康。後患痰涎壅盛。舌強語塞。用二陳湯。蒼朮知柏。澤瀉。數劑而愈。再用補中益氣湯。調理而安。

一男子素清苦眉盡落病在肝膽二經也乃刺臂腿腕及患處出黑血空心服八珍湯加五味胡麻首烏威靈食後服換肌散喜其無兼變之症又能篤守禁忌不半年而愈。

一儒者脚心或痒痛或麻癢腫脹二年後身體作痒漸變疔瘡發熱耳鳴日瞽益甚此屬腎虛也乃砭刺臂腿腕及手足指縫去其瘀血用六味地黃丸料加五味柴胡五十餘劑以補腎又用換肌散祛風丸各斤許以治瘡漸愈得滋補守禁而痊。

一上舍遍身患之形病俱虛謂須調補元氣完復方治其瘡不信恪服蛇酒以攻內毒更敷砒霜等藥以傾外毒頓加

嘔吐清水。體痛如錐。或以爲毒氣外發。不知脾主肌肉。此因毒藥傷脾而然也。反服祛毒之劑。吐瀉不止而歿。

一男子患癘風。用藥湯熏洗。汗出不止。喘激不食。腹鳴足冷。肢體抽搐。謂此因熱傷元氣。腠理不密。汗出亡陽耳。是日果卒。

下疳

此症與梅毒瘡無甚差別

丹溪治一隣人。年三十餘。性狡而躁。素患下疳瘡。或作或止。夏初患白痢。膈上微悶。醫與理中湯四帖。昏悶若死。片時而甦。脈之兩手皆澀。重取畧弦。似數。曰。此下疳瘡之深重。

者與當歸龍薈丸去麝四帖而利減。與小柴胡去半夏加黃連白芍川芎生薑煎服五六帖而安。

薛立齋治一男子下疳腫痛不消。一男子潰而腫痛發熱小便秘澀。日晡或熱。一小兒腫痛。諸藥不應。俱以小柴胡湯吞龍薈丸數服而愈。

一小兒十五歲患前症。雜用消毒之藥。虛冷悉具。三年餘矣。詢之乃稟受所致。用草薈湯。月餘諸症漸愈。又用補陰八珍湯。補中益氣湯而瘥。

一男子陽事腫痛。小便如淋。自汗甚苦。或尿血少許。尺脈洪數。按之則澀。先用清心蓮子飲。加牛膝山梔黃柏知母柴

胡數劑。更以滋腎丸一刻而痊。王機微義曰。如自汗小便自少。若再利之。則榮衛枯竭。無以制火。而煩熱愈甚。當俟熱退汗止。小便自行也。兼此症。乃陽明經病。大忌利小便。張景岳治一少年。因偶觸穢毒。遺患下疳。始潰龜莖。敷治不效。旋從馬口。延入尿管。以漸而深。真直至肛門。逐節腫痛。形如魚骨。每過夜則膿結馬口。脹不得出。潤而通之。則先膿後尿。敷洗皆不能及。張嘗遇一山叟。傳得槐花蓋方。因以治之。不十日莖根漸愈。半月後自內達外。退至馬口而痊。後現些微廣瘡。復與五加皮飲。十餘劑而愈。向傳方者曰。此方善治淫瘡熱毒。從小便泄去。且服此者。可免終身。

瘡毒後患。然猶有解毒奇驗。則在發瘡之時。但見通身忽有雲片紅斑。數日而沒者。即皆瘡毒應發之處。瘡毒已解。瘡形猶見。是其驗也。張初未之信。及此人應發瘡之時。固不多。而通身紅斑果見。凡兩日而消。方在新因陣四十

立齋治州守姜節甫。患下疳。膿水淋漓。作渴吐痰。午前惡寒。午後發熱。曰。午前惡寒。屬陽氣虛弱。午後發熱。屬陰血不足。不信。反服二陳知栢之類。飲食益少。大便不實。又日晡熱渴。小腹重墜。患虛炊腫。服四物知栢之類。飲食不思。此脾氣虛而下陷。先用補中益氣湯調養脾胃。以升陽氣。諸症漸愈。又用六味九滋補腎水。以生肝血而痊。

一男子患下疳腫硬焮痛寒熱先以人參敗毒散二劑而止更以小柴湯加黃連青皮治之而愈

一男子患下疳潰而腫痛小便赤澀以加減龍膽瀉肝湯加青皮黃連二劑少愈又以小柴胡湯加知柏當歸茯苓數劑而愈

一男子因勞莖竅作痒時出白物發熱口乾以清心蓮子飲治之面安

一男子患下疳潰而腫痛發熱日晡尤甚以小柴胡湯加黃連知母當歸而愈

一男子患下疳已愈惟莖中一塊不散以小柴胡湯加青皮

荆防服之。更以荆防牛膝首烏滑石甘草各五錢煎湯熏洗各數劑而消。

一男子莖中作痛，或筋急縮，或作痒，白物如精，隨溺而下，此筋疝也。並用龍膽瀉肝湯治之，皆愈。張子和曰：遺溺閉癢，陰痿，痔瘡，精滑，白淫，皆男子之疝也。不可妄歸之腎冷。若血涸不月，月罷腰膝上熱，足躄，喘乾，癢閉，小腹有塊，或定或移，前陰突出，後陰痔核，皆女子之疝也。但女子不謂之疝，而謂之瘕。

一男子下部生疔，諸藥不應，延及遍身，突腫，狀似翻花，筋牽骨痛，至夜尤甚。此肝腎二經溼熱所致。先以導水丸五服。

次以龍膽瀉肝湯數劑。再與除溼健脾之藥。外貼神異膏。吸其膿血。蒜炙拔其毒而愈。若表實者。以荆防敗毒散。裏實者。以內疎黃蓮湯。表裏俱實者。防風通聖散。表裏俱虛者。八珍湯。氣虛者。四君子湯。血虛者。四物湯。俱加兼症之藥治之。並愈。瘍科大法畧具于此。若服輕粉等藥。反收毒于內。以致迭發。槩服防風通聖散。氣血愈虛。因而不治者。多矣。

繆仲淳治數友下疳。用黃柏宮粉膩粉杏仁珠末冰片敷之。無不愈者。後去膩粉杏仁。加黃芩。更以大小薊地骨皮湯。

洗淨敷之。效更良。廣筆記

又下疳。參方。椒欖燒灰研細末。糝之。

仲淳治下疳極秘神方。用鮮小薊、鮮地骨皮各三兩，煎濃汁浸之。不三四日即愈。一切極痛者，屢用神效。同上

立齋治一老人，患下疳，小便淋漓，脈細體倦，此氣虛兼溼熱也。用清心蓮子飲及補中益氣湯治之而愈。又一弱人物中作痛，小便淋瀝，此因火燥，下焦無血，氣不能降而滲泄之令不行。用四物湯加黃柏、知母、茯苓、牛膝、木通十餘帖，痛止便利。先君氣短，胸中若瘡，小便不通，用四物湯加參芪煎吞滋腎丸而愈。蓋前症以虛為本，以病為末，益其本則末自去。設若不固元氣，專攻其病，害滋深矣。

王錦衣年逾四十，素有疝瘡，熯痛倦怠，用小柴湯加黃連、黃

柏青皮當歸而愈。

繆仲淳治下疳方。蟬退七分。白僵蚕用紫蘇葉包蜜炙七個。杏仁去皮尖七粒。芭蕉根搗爛五錢。獨核肥皂仁七粒。雪裏紅一把。打爛土茯苓去皮二兩。白蘚皮一錢。牛膝二錢。黃柏一錢。木通七分。皂莢核七粒。薏苡仁二錢。連翹一錢。漢防已酒浸六分。甘草節一錢。石斛三錢。柴胡六分。草薢二錢。地骨皮二錢。水煎不拘時饑則服。氣虛脾弱者加蜜炙黃芪三錢。血虛加生地三錢。

梅瘡

李時珍曰今醫家有搜風解毒湯治楊梅瘡不犯輕粉病深者月餘淺者半月即愈服輕粉藥筋骨攣痛癱瘓不能動履者服之亦效其方用土茯苓一兩薏仁金銀花防風木瓜木通白蘚皮各五分皂莢子四分氣虛加人參七分血虛加當歸七分水二大碗煎飲一日三服忌飲茶及牛羊

雞鷺魚肉燒酒發麵房勞蓋秘方也
本草綱目 雄按史 搯臣方當歸五錢淨

銀花防風荆芥何首烏勿犯鉄器木捧打碎各三錢肥皂子九个打碎土茯苓瓷鋒刮去皮木棒打碎四兩猪脰一具河水六碗瓦器煎濃每早中晚空心温服一碗恪守禁忌雖年久毒重者二十劑即收功且無後患此方平淡而有神效也

縣中陳某家有使女生廣瘡求治于方上道人其方只用乾

荷葉一味煎濃湯當茶日逐飲之盡量而止不過六七日
卽愈親試甚驗又一當縣甲首者生廣瘡傳方上道人方
用麥母子草根搗汁和好酒同服卽愈其草取竹中無露

水者爲上

李羽戒
菴漫筆

馮楚瞻治張姓人曾患梅瘡清涼解毒而愈未幾忽頭顱面
頰牙床鼻柱疼痛不堪飲食難進謂餘毒爲害復用清涼
解毒漸致飲食俱廢坐臥不寧精神疲困六脉微弱馮曰
果屬陽毒脉宜洪大此爲寒涼久服致陰陽失職耳卽惡
瘡初發亦由精血元陽虧損斯陰寒凝涇之氣得以乘之
乃與大劑熟地麥冬白朮牛膝五味附子兼八味丸並服

半月而愈。雄按如果涼藥過投陰寒凝滯為病而六脉微弱則當溫煦以培陽氣何必再用大劑熱地以

滋室賦哉

孫文垣治吳東星瘧止腰疼白濁咳嗽肌肉大消百治不應痛劇欲死脉之左弦細右滑大俱六至口渴眼赤知其昔患梅瘡餘毒尙伏經絡因瘧後氣血不足舊毒感動故痛而暴也以當歸白芍甘草牛膝鈎藤薏仁木通白蘇皮用土茯苓四兩煎湯煎藥服下痛止嗽脉緩其半數帖大效精神漸復冬至日乘酒縱慾次日腰如束縛足面疼左眼赤小水短足底有火從兩胯冲上痛不可言再以歸芍鈎藤甘草牛膝薏仁石斛紅花生地黃柏調理三日症畧減

適大雪寒甚。有女醫因其大便燥結。一日夜進玄明粉一
而五錢。大便且不行。而腰痛愈猛。兩足攣縮。氣息奄奄。面
青慘。六脉俱伏。痛使然也。知服玄明粉所致。曰症雖熱。但
病在經絡筋骨間。徒瀉腸胃無益也。足攣腰痛也者。由天
氣寒極。經絡凝滯。法當溫散寒邪之標。使痛定。然後治本
乃用桂心杜仲炙草蒼朮破故紙五加皮二劑痛定。四肢
柔和。飲食始進。囑曰病在經絡。俟春和始可除之。勿亟也。
不信。更服滋陰降火之劑。兩月無功。再求治。乃以煨腎散
進大瀉五六度。仍是瀉其腸胃矣四肢皆冷。咸以爲瀉之非也。曰
病從此減矣。夫何憂再進理脾藥數帖。神氣遂轉。腰膝柔

和漸能步履乃以威靈仙末二錢入猪腰內煨食之又瀉
一二度審其梅毒溼熱已清改用薏仁當歸生熟地白芍
牛膝黃柏丹參龜板調理全安。雄按煨腎用甘遂或用牽
牛皆通行經絡不比元明
粉之直走陽明也繼
煨以靈仙用意尤妙

俞東扶曰此條病情反覆孫公能隨其病機曲折以赴之就
所錄者已有七次治法惟始終彙載方知其中間有效有
不效乃可垂為模範苟逸其半而存其半則不知來路之
淵源未明結局之成敗何以評臬其是非乎因不禁慨然
於臨證指南

朱懷竹壯年客外不謹患楊梅瘡恐人知之欲歸乃求速愈

用藥熏洗不瘳。又用藥末點之。日服煎藥三帖。治兩月毒且入內。下則肛脫瘡滿如葷。上則肺壅喘甚。胸脹不能仰。臥內熱惡寒。謔語。陰囊疔瘡腫痛。兩足瘡延腫。大脉之俱洪大而數。曰病重甚。壯年猶可治。第胸中有瘀血毒物。俟出後乃可與藥。否則反用致疑。另延醫果大發喘嗽。吐紫黑血塊如膿者。碗許。腥穢不可近。此熏藥迫毒入肺。痰壅肺竅。喘嗽必俟吐盡。從而消之。斯易爲力也。乃用丹皮。桑白皮。白蘇皮。木通。前胡。枳殼。桔梗。甘草。薏仁。杏仁。葶藶。服後大便急重。二十餘次。所下黑紫膿血甚多。喘咳稍定。紅痰稍淡。二三劑能卧。改用白芍。當歸。白蘇皮。貝母。黃連。銀

花皂角蕙仁麥冬木通二帖足瘡腫漸消陰囊出膿血二碗兩尺已不洪大前方加丹參又二帖囊結疤三日後落下厚可半寸洞見兩丸系一光薄白胞用紅粉霜加生肌藥敷之曰三次膿水乾再以人參歸芍白芷甘草白蘇皮皂角蕙仁首烏調理一月悉愈合日用土茯苓豬肉各半斤同煎爛入醬鹽如常食之湯當茶飲遂瘳次年生女譚公亮患結毒醫用五寶丹餌之三年不效仲瀆云五寶丹非完方也無紅鉛靈藥不能奏功時無紅鉛姑以松脂鉛粉麻油調敷應手而滅公亮先用喬伯珪所贈乳香膏止痛生肌甚捷及用此二味功效彌良乃知方藥中不在珍

貴之劑也。廣筆記

陸養愚治朱少川因感冒寒熱咳嗽筋骨疼痛服發散之藥寒熱已除而疼痛咳嗽不止或以羌活治痛前杏治嗽不效又以其漁色必陰虛投六味月餘反口渴異常身熱疼痛益甚脈之沈細弦數而有力因問其曾患梅瘡否答曰已過矣曰此症正其遺毒也疼痛者毒在經絡骨髓也咳嗽口渴者毒火上炎也用養血解毒之劑倍土茯苓數劑而減十劑全愈。

薛立齋治一男子遍身皆患梅瘡左手脈浮而數以荆防

敗毒散治之表症乃退以仙方活命飲六劑漸愈兼飲葶

薤湯月餘而愈。

一童子外腎患此症延及小腹數枚作痛發熱以小柴胡湯吞蘆薈丸更貼神異膏月餘而安。

一儒者患前症先外腎作痒出水後陰囊股內小腹脇臂發小瘰或乾或膿窠誤服祛風等藥肢體倦怠惡寒發熱飲食漸減大便不實脉見浮弦兩尺浮數此腎水虛熱肝木乘脾土也用六味地黄丸補中益氣湯為主佐以換肌消毒散而愈。

一人患此症服攻毒等藥患處凸而色赤作痛肢體倦怠惡寒發熱脉浮而虛此元氣復傷而邪氣實也用補中益氣

湯二劑而愈

進士劉華甫患此症數月用輕粉硃砂等藥頭面背臂各結一塊二寸許潰而形氣消弱寒熱口乾舌燥唇烈小便淋瀝痰涎上湧飲食少思此脾胃傷諸藏弱而虛火動也先用六君子湯二十餘劑又用補中益氣湯加山藥山萸麥冬五味服之胃氣復而諸症愈惟小便未清痰涎未止用加減八味丸而痊

一男子患楊梅瘡後兩腿一臂各潰二寸許一穴膿水淋漓少食不睡久而不愈以八珍湯加棗仁茯神服之每日以蒜搗塗患處多良久遂貼膏藥數日稍可却用豆豉餅炙

之更服十全大補湯而愈

一婦人患此症皆愈惟兩腿兩膝各爛一塊如掌兼筋攣骨痛三年不愈諸藥無效日晡熱甚飲食少思以草薺湯兼逍遙散倍用茯苓白朮數劑熱止食進貼神異膏更服八珍湯加牛膝杜仲木瓜三十餘劑而愈。

薛立齋治一婦人患此症燃輕粉藥于被中熏之致遍身皮塌膿水淋漓不能起居以滑石黃柏菜豆粉末等藥鋪席上令可卧更服神功托裏散月餘痊。

青浦四十二堡一大家娶妾生楊梅瘡遍身潰爛臨終棄之于野一乞丐收養之數日不死女忽思食肉適有數盜在

孟婆墩祭賽丐者乞肉卽與一肩懷歸食婦食未盡者懸之樹枝爲蜈蚣所食毒侵肉中婦食之瘡爲毒發旬日全愈其色更麗于前丐欲送歸婦不許曰我當終身從君矣遂爲伉儷生一子丐者日操舟乞食龍潭其婦言笑不苟

亦云賢矣

雲間雜志

立齋治一男子咽間先患及于身服輕粉之劑稍愈已而復發仍服之亦稍愈後大發上腭潰蝕與鼻相通臂腿數枚其狀如桃大潰年餘不斂神思倦怠飲食少思虛症悉具投以葦薜湯爲主以健脾胃之劑兼服之月餘而安

一婦人患此症臉鼻俱蝕筋骨作痛脚面與跟各腫一塊三

月而潰膿水淋漓，半載不斂，治以前藥亦愈。

一男子陰莖患此症，腫痛，先以導水丸、龍膽瀉肝湯各四服，少愈，再以小柴胡湯加黃柏、知母、蒼朮五十餘劑而平。

一男子患此症，陰莖腫潰，小便赤澀，肝脈弦數，以小柴胡湯加木通、青皮、龍膽草四帖，又服龍膽瀉肝湯數貼而全愈。

一婦人患此症，焮腫便秘，作渴，脈沉實，以內疎黃連湯二劑，裏症已退，以龍膽瀉肝湯數劑頓退，間服葶藶湯月餘而愈。

一男子患此症，發寒熱，便秘，作渴，兩手脈實，以防風通聖散治之而退，以荆防敗毒散兼龍膽瀉肝湯愈。

一男子患此症愈後腿腫一塊久而潰爛不斂以蒜搗爛敷患處用艾隔蒜灸之更貼神異膏及服黑丸子並托裏藥兩月而愈。

一男子患此症皆愈但背腫一塊甚硬肉色不變年餘方潰出水三載不愈氣血俱虛飲食少思以六君子湯加當歸藿香三十餘劑少愈更飲草薺湯兩月餘而愈。

一男子患此症勢熾兼脾胃氣血皆虛亦服前藥而痊後不復發。

馬銘鞠治李行甫患徽瘡

俗名廣瘡

誤用水銀硃等藥搓五心

三日間舌爛齒脫喉潰穢氣滿室吐出腐肉如猪肝色湯

水不入腹脹二便不通醫皆謝去。獨用治喉藥吹喉痰壅愈甚痛難忍幾死。馬按其腹不痛。雖脹滿未堅。猶未及心。知水銀毒入腹未深。法宜以鉛收之。急用黑鉛斤餘分作百餘塊加大劑甘桔湯料。銀花甘草各用四五兩。水二三十碗。鍋內濃煎。先取三四碗入湯注中。徐灌之。任其自流。逾時舌漸轉動口亦漱淨。卽令恣飲數盞。另取渣再煎。連前濃汁頻濯手足。次日二便去黑水無算始安。方用吹口藥及敗毒托裏藥數劑而愈。後賈僕有顏孝者亦患黴瘡。誤用水銀熏其症如一行甫卽以前法治之。次日立起。

廣筆

記

廣筆記治黧瘡方猪胰脂二兩。金銀花二錢。皂角刺一錢。芭
蕉根一兩。雪裏紅五錢。五加皮二錢。土茯苓白色者二兩。
皂莢子七粒。打碎獨核肥皂仁七粒。切片白殭蚕炙七分。
木瓜一錢。白蘇皮一錢。蟬退一錢。年久力衰者加薏苡仁
五錢。甘草節二錢。綿黃芪三錢。生地二錢。人參二錢。久不
愈。加胡黃連三錢。胡麻仁二錢。全蝎七枚。水三大碗。煎至
一碗。不拘時饑則服。

廣筆記治結毒方。獨核肥皂仁七粒。雪裏紅一名千年矮一
兩。皂莢子七粒。甘艸節一錢半。木瓜錢半。蟬退一錢。青木
香一錢。土茯苓白色者二兩。綿黃芪鹽水炒三錢。連翹一

錢。白殭蚕密炙炒研七分。驚風胡麻仁炒研三錢。白芷一錢。何首烏三錢。金銀花三錢。水煎服。

又方極木一名十大功勞一名貓兒錢。即本草拘骨黑子者是。

紅子者名樞木亦可用取其葉或泡湯或爲末不住服此方兼治積年虛勞痰火健脾進食。

廣筆記云凡父母正患癩瘡時生兒鮮有完者其證渾身破爛自頂至踵兩目外幾無完膚日夜號泣或吐或瀉似瘡似驚變態百出若別作治療十無一全治法以牛黃爲君量加犀角羚羊角硃砂水片和入茯苓粉生密調服使兒日日利出惡毒見有他證隨宜治之毋亦隨宜用藥其外

用大粉草金銀花爲極細末。二三升。破爛處洗淨。大握敷之。半月後再易神效敷藥。再敷數日愈。愈後一兩月當復發。再後兩三月當再復發。發漸輕。仍如法治之。自愈。愈後或口角眉角。或肛門存二三餘毒。不必治矣。其渾身或癬或瘡。忽聚忽散。敷之便愈。大抵年餘始得除根。若母不禁口。或兒漸大。不能禁口。有延至二三年者。然不斃足矣。胎中之毒。徹骨入髓。焉能旦夕除哉。

昇藥五靈散方。礬泪筋而滋肝。辰砂養血而益心。雄黃長肉而補脾。明礬理脂膏而入肺。磁石榮骨而壯腎。此方見焦氏。外加水銀一兩。與前五味等分和勻。入陽城罐內。打

火三炷香。取出加入敷藥中。用之效。又神效敷藥百。合花
白者。良陰乾象皮。同黃砂炒。候軟切片。再炒。候冷。方研降
香炒。研乳香。沒藥。各去汗。血竭。兒茶。溼紙包煨。花蕊石。五
倍子。色帶紅者。良。半生半煨。各一兩。白蠟八錢。珍珠五錢。
冰片一錢。各研極細末。方入白蠟研勻。最後入冰片。如欲
去腐。每兩加五靈散二錢。欲生肌。每兩加前散三分。或五
分。如治痘後膿水淋漓。下疳等瘡。只加一二分。治湯火傷。
每兩加絲綿灰二錢。剔牙松皮煨。存性五六錢。鉛粉煨黃
五六錢。或乾糝。或香油調。一切外症俱效。